

Jü Carta San Perota Guosa Huëpo Jiojtekähui

Teboteri

¹ Inapo Simon Peero, Jesucristota sáuhuëhui éntok ápostol áapörík bétana yeu púari, enchimmeune jiojte, eme jume ito beu itom Dios itom jínëukame Jesucristota lútüria béchïbo huaka Diostat ehuamta tua musäla machik jájamlame.

² Huä Diosta tü eäu éntok yánti jíapsihuame chëhuasu enchimmet ayunake Diosta éntok itom Señor Jesústa enchim täyakä béchïbo.

Jume Diosta jíapsi jïpureme

³ Sïme hua jíapsihuamta bétana huéeme, éntok Diostau huátihuä bétana huéeme itom miiki áapörík Diosta úttearammea hua ä ujoyóriay éntok yörisi machiku ay itom núnukamta itom täyakä béchïbo,

⁴ huámëi huämi buéresi musäla machik itou nätua, huäri huam Diosta bënasi enchim jíapsinakë béchïbo, huaka ím ániapo yore jíapsi nasontemta takahuata jita ukulëu béchïbo ayukamta tóij-lataka.

⁵ Íäri béchïbo eme két át jíapseka tekipuananake, enchim ä sülähuem tü éerita rúktia, jü tü éeritau éntok jítat jünee huamta,

⁶ jítat jünee huamtau éntok emo yüihuamta, emo yüihuamtau éntok yánti jíapsihuamta, yánti jíapsihuamtau éntok Dios huátihuamta,

⁷ Dios huáatihuahtau éntok sailapo emo huatiahuahtau éntok yore nákhuahtau.

⁸ Bueituk íkái enchimmet ayuak éntok jíba enchimmet ä yötui, kaibem kía jíapsina, kaita joaka, jíbem tekipuanuanake itom Señor Jesucristota chéhuasu enchim täyanaké béchíbo.

⁹ Të hua síme íkái kaa jípureme hua kaa mékka bíchamta bénasi maachi; líptita bénasi maachi, bueituk huaka bannaataka kaa ä tühua yáarim bétana ä tü huéchilatukäu kóptiala.

¹⁰ Huári béchíbo, hermanom, tuem át jíápseka tekipuanua Diosta enchim núnutukä bétana éntok enchim yeu púatuakä bétana enchim ä lütüria yáanaké béchíbo; bueituk ínel anétekem jauhuey júnem kaa huáttinake.

¹¹ Bueituk junéli jíbem buéresi al-leriahuaka mabetna, áman huaka itom jínëukamta itom Señor Jesucristota yü néshuepo.

¹² Íari béchíbo, ínapo jíba enchim áu huáatitua, enchim ä jüneriay junne, éntok huaka lütüriata én enchim jípurëubet útteata enchim nülatuk junne.

¹³ Ino béchíbo türi, én takahuapo aneka enchim ín búsanakëhui enchimmeu nokaka;

¹⁴ jünéaka lautí íkã takahuata ín tö simnakëhui, itom Señor Jesucristota nee jüneetuápo ámani.

¹⁵ Ínapo két át jíápseka tekipuanuanake, chúkula nee muksuko íahuí enchim huáatinaké béchíbo.

Jume Cristota ujjória bíchakame

¹⁶ Bueitukte itom Señor Jesucristota útteara bétana enchimneu nookak éntok júchi ä yebijnakeu bétana, të kaa kía nokta árai huäpo áman yáata nokaka, ál-la huaka ä yörisi máchiraata itom pusímmea itom bíl-latukäpo ámani.

¹⁷ Bueituk áapörík jü Dios Áchayta bétana yörihuamta éntok ujoyóriata mabetak áman buere ujoyóriata bétana jáhui áu kóm bíttuahuak ínel jíaka: “Íri ájária jü ín Üusi ín nákehui; áapo jü tua nee al-leetuakame.”

¹⁸ Itapo éntok íkái jáhuita jíkkajak téhueka bétana kóm bíttuahuakamta, áman káuhui santo ti téhuaahuakapo áamak aneka.

¹⁹ Atä jípure kétchi jume profetam nooki, të én chë lútüriapo tahualata. Türi enchim béchibo enchim át suähui hua nokichi hua machiria kaa machiku béetemtät enchim suä bénasi, machiriata yeu kíktëu tájti éntok Jesucristota enchim jíapsita machiriäu tájti, hua buere chóki matchuu bíchaa yeu hueramame ti téttehuaahuame.

²⁰ Tem bát íkái jüneria, kía jita noki júne profetam bétana huémta jiojteripo ayukamta kaa yoremta éäpo áachä jüneenakëhui,

²¹ bueituk kía jauhuey júne profetam noki kaa yoremem éäpo nokhuak, ál-la jume yoremem Diosta yeu púarim Espiritu Santota éäpo áman nookak.

2

Profetam ára nókichim éntok maestrom ára

nókichim
(Jud. 4-13)

¹ Të kët bannaataka jume profeetam ára nókichiram aaney Israelta yoremraata násuku, maestrom ára nókichiram enchim násuk annákë bénasi, huame kaa jünakiachisi täbuik enchim majtianakeme, hua tua lütüriata bétana huémta tatabbáreka. Señorta am jínëukamta jünem kaabë tíanake, junëlim läutipo huaka kaitäpo bem tahuanake emo jariuria.

² Éntok juebénaka huaka kaa tühuata bem majtiahuakau jonake. Júmëi béchïbo jü tü nooki Jesucristota bétana huéeme jájana át noknake.

³ Éntok tómita buéresi bem huáatiä béchïbom ára nókichiata enchim majtiaka enchim ä úhuaanake. Huámechïri béja jauhuey naateka béttesi nokta ámet chúpatunakeu kaa bínhuatunake, juka jiokot máchiraata bem bínnakëhui, bem kaitäpo tahuanakeu jíba yúmanake.

⁴ Bueituk Dios huame ángelesim Dios bejrita yáakame kaa am jiokorek, ál-la béetekum kömam guötiak huam kaa machiku pereesopo am tójjak, hua taahuari ámet nokta chúpanakeu tájti.

⁵ Éntok juka yoremraata bannaataka huémta júne kaa jiokorek, Noéta jíbba, huaka lütüriata bétana nokäuta éntok guoy búsanim áamaki; huame juéna yórememmeu buere bániata, diluvio téamta, bíttuak áma am kókko íaaka.

⁶ Alë bénasi huame pueblom Sodoma éntok Gomorra nokta ámet chúppak am luutinakë

béchibo, náposasi am tahuariaka, éntok ejemplopo am yétchak, huame kaa tühuata jo báareme béchibo.

⁷ Të juka tü yórem Lotta áma yeu huíkkek, huaka juëna yóremem kaa huéeläpo juënasi bem anëubei kaa al-learnata.

⁸ Bueituk i tü yóreme áme násuk jóakay chíkti táapo ä jíapsi kaa al-leetuay huaka kaa tühuata jume yoremem joäu bíchaka éntok huaka nokta kaa türík jikkajaka.

⁹ Jü Señor jita juënarata bétana júne huame tü yóremem ára jínëu, jume juëna yóremem éntok am ërianake jìokot máchiraata am bínnakë béchibo áman taahuata nokta ámet chüpanakeu yúmáyo.

¹⁰ Chë júne siroksi machisi ámeu huéenake huame takahuata bétana huémata guojaasemmehui, huame takahuata jita ukulëpo áman kateme, jaiti máchiraata boojoriame, éntok huame Señorta yäura kaitäpo bíchame. Ímëi kaabeta jáchin ériaka yäurata béj-reka aane, kaabetam májhueka huame yörisi machisi nésahuemmet jájana jiaahua.

¹¹ Huame Diosta ángelesim chë útteaka éntok chë nésahueka junne kaa béttesi nokta ámet jíjìmma, Señorta bíchápo.

¹² Të ímëi yoremem hua kaa bem át jüneäubet júne juënasi nokame, huame animal kaa jüneame súa béchibo yeu tómtilamtaka mámpo jípuhuame bénasim jum bem kaa tühua yáarimmak kókkonake,

¹³ hua kaa tühua bem yári béchibo béjhuata mabetak, béjasum chíkti táapo huaka kaa

tühuata bem jonakeu musäule. Ímëi ínel jume jaiti mamachim, éntok máncam, enchimmak jibuäka júnen jíba kaa tühuata boojoria, éntokim jíba emo al-leetua.

¹⁴ Bempo kía jíba jume jáamuchimmet pupujte, katim íchakte juënarata joaka, huame géntem kaa bem jíapsi tútti jípureme náyote. Bem jíapsi jita chíkti huáatiaubet jóyhuala, éntokim kaa tühuata násuk usiarim.

¹⁵ Huakam böota lútula huémta tójaka täbuikut kaate, jü profeta Balaam jü Beorta üusi böochi, huári huaka juënaraata béjhua chë nákkek.

¹⁶ Të béttesi nokta jíkkajak kaa tühuata ä yáakä béchïbo; bueítuk jü animal kara nokame ä püaateme yorem ténasi áu nokaka hua profetata kaa súara ä yáa bárëu táktiak.

¹⁷ Ímëi kía jume pozom kaa bäakame bénasi mamachi, namuta buere jékata huéria bénasi mamachi; áme béchïbo hua tua kaa máchira náikiari jíba béchïbo.

¹⁸ Bueítukim buéresi kaita béj-remta nokaka takahuata ukulëubei ámeu bíchaa am huiike, huame jïob-lataka kateme tua tóij-lame én jübua jíapsi kúaktilame.

¹⁹ Búttiataka bem jíapsinake tíakam ámeu nooka, të bempöisu jü kaa tühuata hétuk emo jípure. Bueítuk kía jábe júne úttearäpo kobahuak hua ä kobakamta hétuk áu jípunake.

²⁰ Tua lütüriapo bempo hua juënaraata ím ániapo ayukamta hétana áma yeu sákalataka, juka Señor Jesucristota, juka yore jínëumta, bem täyaka béchïbo, éntokim júchi áma emo

kuuriakätek emo nénkilamtaka tahuanake. Huanäi hua ámeu huéenakeme chë júne jikot machinake bannaataka kee bem ä tátäyäpo béppa.

²¹ Bueituk chë türi éiyey áme béchïbo juka Jesucristota tü noki kaa täyako, ä täyasulataka éntok júchi bem amáu nóttëpo béppa, juka Diosta nésahui bem téjhuahuakau tójaka.

²² Të hua noki tua lütüriata jiäpo ámanim aane, hua ínel jíame: “Huä chüu júchi ä bísachi buäye, kohui éntok úbataka júchi techoapo áu bíaktia.”

3

Jü taahuari Señorta át yebijnakeu yúmanake

¹ In nákehui, ïri jü jíösia guosa huëpo ín enchimneu jïojtëhui, éntokne náhuichimpo enchimneu nokaka enchim bússa enchim jítäu huáatinakë béchïbo,

² huame santo profeetam jauhuey nok-läu enchimneu huáatinakë béchïbo, éntok hua Señor itom jínëukamta nésahui apóstolim itom téjhuakaubehui.

³ Íkái bát jünériaka, bueituk jume taahuarim äbo huéenakemmet yore junnerianakeme yáijnakëhui, bem takahua jita ukulëpo áman jíba kateka,

⁴ ínel jíaka: “¿Jáchisu yeu siika jü júchi ä yebijnake bétana ä nokakähui? Bueituk huame itom áchayim kókkoka taahuarit naateka síme jíba bénasi huéiye, ániata jünaktehuakapo naateka én tájti.”

⁵ Ímëi ínel jünaktekam kaa ä jüneria báare, juka téhuekata Diosta ínel jíakä béchïbo yáatukähui, éntok juka buíata báatukaï bétana éntok bãy ä jiapsähui.

⁶ Huä béchïbo, jü ánia bannaataka huéeme buéria baniay lütek.

⁷ Të jü téhueka éntok jü buíya én ayukame Diosta éäpo bëri hua taahuari nokta ámet chúpanakepo tájti, tájiaý ä luutinakë béchïbo, chíkti juëna yórememmak náuhui.

⁸ Të eme nákhuame, íkãrem jüneria: jü Señorta béchïbo jü senu taahuari senu mil huásuktiriata bënasi maachi, éntok senu mil huásuktiria júne senu taahuata bënasi maachi áa béchïbo.

⁹ Jü Señor kaibu ä surujtianake, huaka taahuata ä noki chúpa béchïbo huatem éä bënasi, ál-la símem boobíchaihui, taahuarim itom réuhuasimeka, kaabeta áu tárü iaaka ál-la símem emo jíapsi kúakti iaaka.

¹⁰ Të hua taahuari Señorta át yebijnakeu yúmanake huaka lak-ronta ják tukaapo yepsakäpo bënasi; huaachi taahuarit jü téhueka luutinake mausi buére kusisi jíaka, síme hua jikat ayukame béetisuka kaitäpo tahuana, jü buía éntok síme hua át ayukame két táatunake.

¹¹ Íkãi síme ayukamta kaitäpo tahuanakey, jáchisu ënem kaa Diostau huáateka tülisi emo nüyeka jíapsinake,

¹² boobíchaka éntok emo bamijtuaka huaka taahuata Diosta yéchari yúmanakeu béchïbo, hua taahuarit juka téhuekata béeteka kaitäpo

tahuanakeyo, éntok hua áman jikkat ayukamta tájaka ä kájoktinakeyo.

¹³ Të ítapo ä boobíchaihui áapörík júnen jíakä béchïbo bemela téhuekata, bemela buíata, huam tühuata jonäpo.

¹⁴ Huári béchïbo, eme nákhuame, íkäi boobíchaka tuem chíkti enchim jíapsimak át tekipanua kaita juënarata enchimmet téunä béchïbo, éntok áapörík bétana kaita nokta béttesi machik enchimmet ä jíkkaijnakë béchïbo, yánti jíapsaka.

¹⁵ Éntokem kaa ä koptia, Señorta sïmem jínëu báreka lauti itom ä huériähui; jü hermano Pablo itom nákehui itou jïojtekä bénasi, súahuata ä mikhuakapo ámani,

¹⁶ sïme ä jïojteri jëlaimpo íäri bétana nokaka; huame násuk obiachi ámet júnee béchïbo, huámëisan huame kaita tua täyame éntok náuhui éame am nánayote, két huame huate jïojterim junne, bempöisu kaa tüisi bem emo tahuanaké béchïbo.

¹⁷ Júnëlituk eme, ín nákehui, bát íkäi jüneriaka, emoem suaya, jáchinai júne jume juëna yóremem enchim báitähuak hua enchim óusi eäu kóm huéenake.

¹⁸ Al-lem yötu jum tühuapo éntok itom Señor Jesucristota, itom jínëukamta, täyahuäpo.

Áapörík béchïbo sïme ujoyória näikiatunake, ëni éntok jíba béchïbo. Júnentunake.

Mayo

Mayo: Diosta nooki yorem nokpo New Testament

copyright © 2014 Wycliffe Bible Translators, Inc.

Language: Mayo

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 11 Jun 2026 from source
files dated 13 May 2025

84020f7b-8f34-5f65-803f-a2c6c92b92ea